

**Date – 02/12/2025**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Mizoram Gorkha Mandir Sanchalan Samiti, Bazar Branch hruaitute chuan Prime Minister hnena Hari Mandir humhalh zui tura Prime Minister an dilna chu an sut leh.
2. Cheng vbc 676 senna tur Tuirini HEP thawh thuai dan tur sawipuiin Chief Minister Pu Lalduhoman a office-ah New Development Bank, India hotute a kawm.
3. Nagaland-ah Hornbill Festival vawi 26 na chu nimin khan tan a n .
4. Prime Minister Narendra Modia chuan Parliament thutkhawmah Member thang thar zawkten an bial chhung harsatna an sawichhuah ve theihna tura fuih phur a tul tih a sawi.

<><><>

**CM- HARI MANDIR**

Mizoram Gorkha Mandir Sanchalan Samiti, Bazar Branch hruaitute chuan Prime Minister hnena lehkha an lo thehluk tawh, Hari Mandir humhalh zui tura an dilna chu, Mizoram hmasawna an ngaihpawimawh vanga an sut thu Chief Minister Pu Lalduhoma an hrilh.

Chief Minister Pu Lalduhoma hian nimin khan a office-ah Mizoram Gorkha Mandir Sanchalan Samiti, Bazar Branch te a kawm a, Canteen kualawm Hari Mandir chungchang a sawipui a. He Hari Mandir hi Aizawl khawpui lailia veng sawmpakhatte lawina a nih avang leh Hari Mandira an bungraw thianghlimte dah zuina tur an mamawh avangin an inkhawm zui zelna tur hmun sorkarin ngaihtuhsak se an duh thu an thlen nghal a ni.

Chief Minister hian, Mizoram Gorkha Mandir Sanchalan Samiti hruaitute chungah hian lawmthu a sawi a. AR ram chhuahsan enkawl zuina hi Advisory Committee kuta awm a nih avangin Hari Mandir sawna tur chu ngaihtuahho a tul tur thu a lo hrilh a. A sawn theihna tur hmunhma remchang te pawh dap tlang ila, a tul angin kan sawiho zel dawn nia, tiin a chah a ni.

AR ram Advisory Committee chuan NGO Coordination Committee te chu Hari Mandir chungchangah Samiti hotute titipui turin an ngen tawh a, an report pawh Advisory Committee hnunung berah khan an pe tawh a. An inkawmna kal zelah Samiti hruaitute hian Chief Minister hi an rawn hmu ta a ni.

Chief Minister hi Pu Vanlaldina Fanai, Commissioner & Secretary to CM chuan a tawiawm a ni.

<><><>

## **EMPOWERING MIZORAM SPORTS**

**Infiamna lama inkaihhraina mumal zawk a awm theihna tur leh Mizoram pum dapchhuaka thalaite talent hai chhuahna tura sawrkar hmalakna ‘Empowering Mizoram Sports’ chu nimin khan Aizawla Ramhlun Indoor Stadiumah Home Minister Pu K Sapdangan a hawng.**

**Mizoram Sports Council huaihawt he programme ah hian Home Minister chuan thu sawiin Empowering Mizoram Sports (EMS) chu Mizoram tan infiamna lama bungthar pawimawh tak a nih thu a sawi a, sport lama khawvel hriata mizote an inpho chhuah theihna tura hmalakna pawimawh tak a nih thu sawiin kum 2036-a Olympic games lo awm tur atana inbuatsaihna tur a nih thu te, thalaite ruihhlo leh ngawlveina hrang hrang lak atanga chhanchhuahna tur peng pawimawh tak pakhat a nih tur thu a sawi a; awmze nei lehzuala training kalpuina tura duan inkaihhraina, Training Manual pawh a tlangzarh nghal bawk a ni.**

**He hun hmannaah hian Sports & Youth Services Department hotute, Mizoram State Sports Council hotute leh sports discipline hrang hranga hruaitute leh trainer te an tel a ni.**

**Empowering Mizoram Sports programme hnuaiah hian Mizoram hmun hrang hrangah kum 8 - 15 inkarte basic coaching pek an ni dawn a, coaching hi ni 15 chhung atan ni tin darkar 3, a vaiin darkar 45 pek an ni dawn a ni.**

**Kum 8-15 inkar target an nih chhan hi, kum 2036-a, taksa leh rilru that vanglai thleng tur 'age group' an nih vang a ni a. Mizote thiam zawng, 2036 Olympic Games-a India ram aiawha an tel ve theihna tur nia ngaih sports discipline hrang hrang 24-te thlan a ni.**

**<><><>**

## **CM- HYDRO**

**Kawlphetha Megawatt 24 pechhuak thei tur Tuirini HEP thawh thuai dan tur sawipuiin Chief Minister Pu Lalduhoma chuan a office-ah New Development Bank, India hotute a kawm a.**

**Cheng vbc 676 senna tur Turini HEP siam hna thawhna tur hi sorkar laipui kalflangin New Development Bank, Sanghai sum puk tur a ni.**

**Hna hi tan turin Empowred Committee din fel a, chumi zawhah Project Management Consultancy thlan tur a ni a. Chungte chu tunah hian chak taka kalpui mek a ni. Hengte hi a fel a, central sorkarin a lo pawmpui chuan tender tihchhuah theih a ni ang.**

**Preliminary Project Report (PPR) hi Department of Economic Affairs-ah September 2024 khan thehluh a ni tawh a, MNRE, External Affairs leh NITI Aayog atanga phalna lak ngaite chu lak fel tawh an ni.**

**<><><>**

## **ONLINE BORDER CHECK POST**

**Mizoramah Online Border Check Post Module hman tan a ni a. Hemi pual hian nimin khan Transport Director Pu R Lalrammawia hoin Transport Directorate Conference Hall-ah hun an hmang.**

Director chuan thusawiin, Mizoram Transport Department chuan mipuite tana zangkhai, dik leh awlsam zawka entry tax lak a nih theihna turin theihtawp chhuahin hma a la a, NIC nen tangkawpin tunah hian Online Border Check Post Module hman theih tura peihfel a ni ta a, Live server-ah a dah a ni tawh a ni a ti.

State dang atanga sumdawna thila lirthei lo luttan Mizoram an rawn luhin Entry Tax an chawi a ngai a, chu entry tax chu Enforcement Check Gate-a duty ten manual receipt hmangin an la thin a, chu chu Mizoram sorkar chhiahah chhunluh a ni leh thin a. Border Check Post Module hi computer hmanga common portal kaltlanhga online-a awlsam leh dik taka entry tax lakna tur a ni.

He Border Check Post Module hi hmun hnih – Vairengte Enforcement Check Gate leh Kanmun Enforcement Check Gate ah te dah a ni a. Heng hmunah hian state dang lirthei lut reng rengte chu awlsam takin entry tax an lo la zel tawh dawn a ni.

Ti hian, ramchhunga Checkpost Module hmang tawh state 27 zingah Mizoram hi a tel dawn ta a ni.

<><><>

ZMC

Zoram Medical College & Hospital-ah nimin khan World AIDS day pualin hun hman a ni a. Kumina World AIDS Day thupui hi: Overcoming Disruption, Transforming the AIDS Response tih a ni. Thupui pathum thlan bik hmangin Continuing Professional Development -Seminar hun neih a ni.

He program hi Department of Microbiology, Pharmacology leh Pathology te tangkawpa huaihawt a ni a. ZMC&H Director Prof. Zoramthara Zadeng chuan a hmanpui a ni.

<><><>

MIZORAM GINGER CAPITAL OF INDIA

Mizoram chu ramchhunga sawhthing khawpui-Ginger Capital of India-ah NITI Aayog in puan thu Chief Minister Pu Lalduhoma hova Mizoram Agricultural Marketing Board thutkhawmah tarlan a ni.

Thlahlui ni 24 a New Delhi-a neih zawh tak Mizoram sorkar leh NITI Aayog buatsaih Stakeholders Consultation for Mizoram Ginger Produce ah NITI Aayog chuan Mizoram chu "Ginger Capital of India" ah a puang a, sorkar thuchhuah tarlan danin, he meeting hi Mizoram state puala New Delhi-a official meeting lian ber a la nia hriat a ni.

Sorkar laipua Ministry hrang hrang aiawh leh sawhthing leitu leh process-tu investor 60 chuangten Mizoram sawhthing lei leh hralh chungchang inrawnkhawmna an nei a, hei hian Mizoram chu sawhthing quality tha neitu state a nihzia a tichiang hle a, tun hnaiah Mizoram chu India rama sawhthing thar tam state zingah a inhleng chho mek bawk tih sorkar thuchhuah chuan a tarlang a ni.

MAMB meeting chuan NITI Aayog chungah lawmthu a sawi a, sawhthing quality tha, chemical laka him ngei tharchhuak tura nasa zawka tan

**lak zel an rel bawk a. Kum thar lama Organic hmanga sawhthing ching thei tur khuate chu MAMB hnena in-report turin an ngen a, organic-a kalpui thei khuate chu Collection Center kalflang kher lova, an khuaa leisak dan dap a ni ang. Kumina ching mek zingah pawh organic taka kalpui mek khuate chuan MAMB hi hriattir nghal tur a ni.**

**Meeting a tarlan anih danin, kumin chhung hian sorkar chuan Sawhthing kg vbc 3 nuai 38 sing 3 & 5,182 a lei a, support price pek chhuah zawng zawng zat chu cheng vbc 137 nuai 72 & 4500 vel a tling a ni.**

**MAMB hian December ni 5 - 6 hian Aijal Club-ah sawhthing Buyer - Seller Meet nei turin hma a la mek a, India ram hmun hrang hrang atangin hetiang lama tui mite an lo kal khawm dawn a ni.**

**Meeting chuan State pawn atanga sawhthing Slice Dry lei duh an tam thin avangin Mizo Innovator pahnihte thilsiam Sawhthing channa leh ur rona khawl Rapchung Technology leh Tapchhak Technology khawlte chu Handholding Scheme atanga lei an rel a, a enkawltu turte chu an hnathawh that dan a zira ngaihtuah a ni ang.**

**Meeting-ah hian Agriculture & Farmers Welfare Minister Pu PC Vanlalruata, Minister, Adviser to CM Dr. KC Lalmalsawmzauva leh MAMB member te an tel a ni.**

**<><><>**

## **NEWS**

**Akashvani Aizawl Regional News Unit in Aizawl, Hnahthial, Chawngte, Vairengte leh Champhai North atana Part Time Correspondent a lak tur te interview chu Dec ni 3-ah neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.**

**<><><>**

## **AIR NEWS ON SOCIAL MEDIA**

**Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinthar puan leh a ni ang.**

**<><><>**

## **HORNBILL FESTIVAL**

**Nagaland-ah Hornbill Festival vawi 26 na chu nimin khan tan a ni a. Nagaland hmunhluh hmingthang Kisama khuaah festival hi hman a ni a. Ni 10 chhung awh tur Hornbill Festival ah hian Naga hnam hrang hrangte ziarang leh kutchhuak, hnam lam, rimawi leh kut themthiamna thilte phochhuah a ni ang. Tun tumah hian ram paruk thawhpui a ni a, United Kingdom, Ireland, France, Austria, Malta leh Switzerland te thawhpui an ni a. Hei bakah hian Arunachal Pradesh te state thawhpui an ni bawk.**

**<><><>**

PM

Prime Minister Narendra Modia chuan Parliament thutkhawmah Member thang thar zawkten an bial chung harsatna an sawichhuah ve theihna tura fuih phur a tul tih a sawi. Nimina Parliament thlasik sessionneih hmaa chanchinbumite a kawmnaah he thu hi sawiin Pu Modia chuan thalai member zawkte thiamna leh tawnhriatte House in a chhawr a tul thu sawin ramin thlirna thar a mamawh thu a sawi bawh a ni.

Prime Minister Narendra Modia chuan Winter Session chu tihdan phung mai ni loin ram hmasawna tura nawr kaltu a ni a ti. India eibar dinhmun chuan nasa taka hmasawnin dinhmun sang tak a luah a ti a. Hei hian ram changkanga siam tura beihnaah mipuite phurna a pek nasa a ti a. India chuan mipui rorelna in a thlen thil tha te a taka hmuhtheihin a lantir a ni a ti.

Pu Modia chuan party tin te chu an chaklohna avanga thinrim hrikthlakna atana session hman tum loa ngenin hnehna changte pawh chapon a lantirna hmuna hmang lo turin a ngen a. A tha zawnga ram siamna hmunah chantir zawk turin a sawm a ni.

<><><>